

- प्रधानमंत्री नरेन्द्र मोदी जयपुर मांय राइजिंग राजस्थान ग्लोबल इन्वेस्टमेंट समिट रा उद्घाटन सत्र मांय कह्यो —राजस्थान रा विकास ऊं देश रो विकास तेज व्हेला।
- प्रधानमंत्री महिलावां मांय माली समझ अर बीमा जागरुकता ने बधावो देवण सारू बीमा सखी योजना री सरूआत कीनी।
- राजस्थान कैडर रा आला आई.ए.एस. अहलकार संजय मल्होत्रा भारतीय रिजर्व बैंक रा नुवा गवर्नर बणायी ज्या।
- प्रदेश मांय सीळो बायरो बाजण ऊं ठण्ड बधी-आवता 4-5 दिन कठे-कठे शीतलहर रा आसार।

000

प्रधानमंत्री नरेन्द्र मोदी कह्यो है के राजस्थान री बरकत ऊं देश रो विकास तेज व्हेला। वे आज जयपुर मांय सरू व्ही राइजिंग राजस्थान ग्लोबल इन्वेस्टमेंट समिट रा उद्घाटन सत्र मांय बोल रह्या हा। प्रधानमंत्री कह्यो के कुदरती साधनां रा भण्डार, समृद्ध विरासत, लेंडमार्क, बेहतर कनेक्टिविटी नेटवर्क अर समर्थ नौजवानां री ताकत राजस्थान ने निवेश री खास ठौड़ बणावे है।

-----

प्रधानमंत्री कह्यो के दुनियाभर रा निवेशकां मांय भारत मांय निवेश बाबत घणो उमाव है। वे कह्यो के रिफोर्म, परफोर्म अर टांसफोर्म रा मंत्र ने अपना र भारत जो विकास कीनो है वो हर हलका मांय निजर आवे है। प्रधानमंत्री कह्यो के लारला एक दशक मांय भारत दुनिया री पांचवीं मोटी माली व्यवस्था बण ग्यो।

-----

श्री मोदी कह्यो के किण ई देश री माली व्यवस्था ने मजबूत बणावण मांय एमएसएमई री इकाइयां रो काम व्हे है। प्रधानमंत्री कह्यो के सरकार वां री नीतियां अर फैसलां ऊं एमएसएमई हलका ने लगातार मजबूत बणा रही है। कार्यक्रम मांय मुख्यमंत्री भजनलाल शर्मा कह्यो के सरकार प्रदेश री माली व्यवस्था ने दोगुणी करणो तैय कीनो है। वे आस जतायी के विकसित भारत अर विकसित राजस्थान रा संकल्प ने सांचो करण मांय ओ सम्मेलन खास साबित व्हेला।

-----

सम्मेलन रा उद्घाटन सत्र मांय अनिल अग्रवाल, करण अडानी, कुमार मंगलम बिड़ला अर आनंद महिंद्रा सरीखा आला दर्जा रा उद्योगपति विचार बताया। तीन दिन रा ई सम्मेलन मांय देश दुनिया रा पांच हजार ऊं बत्ता निवेशक, उद्योगपति अर कारोबारी संगठनां रा नुमाइंदा शिरकत कर रह्या है। इण ऊं पैली प्रधानमंत्री राजस्थान ग्लोबल बिजनेस एक्सपो रो उद्घाटन कीनो। इण मांय राजस्थान पेवेलियन, कन्ट्री पेवेलियन अर स्टार्टअप पेवेलियन बणायी ज्या है। रिप्लिट, रिस्पोसिबल, रेडी थीम माथे व्हे रह्या ई सम्मेलन मांय आज कन्ट्री अर न्यारा-न्यारा सेक्टोरोल सेशन व्हा। काल सम्मेलन रा दूजा दिन प्रवासी राजस्थानी सम्मेलन राख्यो जावेला। सम्मेलन रा आखिरी दिन एमएसएमई कॉन्क्लेव व्हेला, जिण मांय एमएसएमई कारोबारी, निवेशक अर जाणकार शिरकत करेला। सम्मेलन रा उद्घाटन सत्र रो प्रदेश मांय न्यारी-न्यारी ठोड़ां सीधो प्रसारण करी ज्यो।

000

महिलावां मांय माली समझ बधावण सागे बीमा जागरुकता ने बधावो देवण सारु प्रधानमंत्री नरेंद्र मोदी आज हरियाणा रा पानीपत मांय बीमा सखी योजना री सरुआत कीनी। भारतीय जीवन बीमा निगम –एलआईसी री ई पहल ऊं 18 ऊं 70 साल ताई री 10वीं पास महिलावां ने खास सिखावण देवण सागे पैला तीन साल सारु वजीफो मिलेला। जळसा मांय प्रधानमंत्री भावी बीमा सखियां ने नियुक्ति प्रमाण –पत्र दीना। ई मौके प्रधानमंत्री कह्यो के वां रा राज मांय लारला 10 साल मांय महिलावां ने मजबूत बणावण सारु केई खास जतन करी ज्या। वे महिलावां ने मजबूत बणावण सारु वां ने और मौका देवण माथे जोर दीनो। कार्यक्रम मांय केन्द्रीय वित्त मंत्री निर्मला सीतारमण कह्यो के सरकार बीमा सखी योजना रा तैत तीन साल मांय दो लाख ऊं बत्ती महिलावां ने भर्ती करणो तैय कीनो है। वित्तमंत्री कह्यो के महिलावां रा भला अर वां ने मजबूत बणावण ऊं जुड़ी योजनावां सारु 3 लाख करोड़ रुपया ऊं बत्ती रकम राखी ज्यी है।

000

देश मांय वक्फ री चल अर अचल संपत्तियां रा आंकड़ा भेळा करण सारु भारतीय वक्फ संपत्ति प्रबंधन प्रणाली–डब्ल्यू.ए.एम.एस.आई. पोर्टल सरु करी ज्यो है। राज्यसभा मांय आज एक सवाल रा लिखित जवाब मांय केंद्रीय अल्पसंख्यक मामलात मंत्री किरेन रिजिजू आ जाणकारी दीनी। वे बतायो के हाल ताई राज्यां रा वक्फ बोर्ड कानी ऊं 8 लाख 72 हजार ऊं बत्ती अचल अर 16 हजार 713 चल संपत्तियां री जाणकारी भारतीय वक्फ संपत्ति प्रबंधन प्रणाली पोर्टल माथे मुहैया करायी है।

000

भारतीय प्रशासनिक सेवा रा राजस्थान कैडर रा आला अहलकार संजय मल्हौत्रा भारतीय रिजर्व बैंक रा नुवा गवर्नर बणायी ज्या है। मंत्रीमंडलीय नियुक्ति समिति रा सचिवालय री ओर ऊं आज ई बारा मांय हुकम जारी कर दिया ज्या। मल्हौत्रा फिलहाल वित्त मंत्रालय मांय रेवेन्यू विभाग रा सचिव रा तौर ऊं सेवा दे रह्या है। भारतीय रिजर्व बैंक रा गवर्नर रा तौर ऊं वां री नियुक्ति 11 दिसम्बर ऊं मानी जावेला। ध्यानजोग है के संजय मल्हौत्रा राज्य सरकार रा न्यारा–न्यारा महकमां अर केंद्र सरकार रा न्यारा मंत्रालयां मांय सेवा दे चुक्या है।

000

प्रदेश मांय सीळो बायरो बाजण ऊं ठण्ड रो असर बध ग्यो है। बाड़मेर अर पाली रे अलावा दूजी ठोडां रात री बगत पारो 12 डिग्री सेल्सियस ऊं नीचे उतर ग्यो। घणखर शहरां मांय कमती कम तापमान 10 डिग्री सेल्सियस ऊं नीचे दर्ज कर्यो जा रह्यो है। लारली रात भीलवाड़ा सब ऊं ठंडी ठौड़ रह्यो जठै 5 डिग्री सेल्सियस तापमान दर्ज करी ज्यो। डबोक मांय 5 दशमलव 2, चित्तौडगढ मांय 6, अंता मांय 6 दशमलव 3, फतेहपुर मांय 6 दशमलव 4, जालौर मांय 6 दशमलव 7, पिलानी, संगरिया अर सीकर मांय 7 अर चूरू मांय 7 दशमलव 3 डिग्री सेल्सियस तापमान रिकॉर्ड करी ज्यो। राजधानी जयपुर मांय ई पारो उतर र 10 दशमलव 3 डिग्री सेल्सियस दर्ज करी ज्यो। मौसम विभाग उत्तर ऊं आ रह्या सीळा बायरा रा असर ऊं प्रदेश मांय पारो 2 ऊं 4 डिग्री सेल्सियस ताई उतरण रा आसार जताया है। महकमा रे मुजब शेखावाटी हलका मांय कठे–कठे तापमान 4 ऊं 6 डिग्री सेल्सियस बीचे रेहवण री संभावना है अर आवता 4–5 दिन कठे–कठे सीळो बायरो बाजण रा आसार है।

000

राजसमंद जिला री देसूरी की नाल मांय काल व्ह्या सड़क हादसा मांय तीन टाबरियां री मौत पाछे आज राज्य बाल आयोग रा सदस्य ध्रुव कुमार कविया वां री टीम सागे अस्पताल पूग र हादसा मांय ज़ख्मी व्ह्या बच्चां रो हाल–चाल पूछ्यो। श्री कविया बतायो के राज्य बाल आयोग री टीम शिक्षा विभाग रा अहलकारां अर जिला कलेक्टर ऊं हादसा रा बारा मांय जाणकारी ले र दोषियां रे खिलाफ कार्यवाही करण समेत बच्चां ने माली मदद देवण बाबत् ई बात कीनी। राजसमंद रा जिला कलेक्टर देसूरी री नाल रा गेला मांय सड़क री मरम्मत करावण अर सड़क माथे लाग्योड़ा निशाणां रा बोर्ड ने दो दिन मांय ठीक करावण रा हुकम दीना।

000

एंटी गैंगस्टर टास्क फोर्स मध्यप्रदेश रा रतलाम ऊं नशीली चीजां ले र आया एक तस्कर ने अजमेर मांय ओछडी टोल नाका माथे पकड़ लीनो। तस्कर रा कब्जा ऊं 227 किलोग्राम ऊं बत्तो गांजो बरामद करी ज्यो, जिण रो अन्तर्राष्ट्रीय बाजार मांय मोल एक करोड़ रुपया ऊं बत्तो मानी ज्यो है। एंटी गैंगस्टर टास्क फोर्स री टीम एक महीना ऊं आरोपित माथे निजर राख रही ही। पूछताछ मांय आरोपित बतायो के वो 10 ऊं बत्ती दफा नशीली चीजां री तस्करी कर चुक्यो है।

000

अंतर्राष्ट्रीय भ्रष्टाचार निरोधक दिवस रा सिलसिला मांय झुंझुनूं जिला मांय बिसाऊ री सरकारी जटिया स्कूल मांय जागरुकता कार्यक्रम राख्यी ज्यो। कार्यक्रम मांय भ्रष्ट सरकारी कर्मचारियां अर अहलकारां रे खिलाफ कार्रवाई मांय मदद करण वाळा शिकायत करण वाळां रो व्हिसल ब्लोअर रा तौर ऊं मान करी ज्यो। एसीबी झुंझुनूं रा एसपी इस्माइल खान बतायो के ब्यूरो री ओर ऊं एसीबी आपके द्वार कार्यक्रम चलायी ज्यो है, जिण ऊं भ्रष्ट कर्मचारियां री शिकायत करण वाळां ने अब एसीबी ताई आवण री जरूरत नी व्हेला। मुफ्त नम्बर माथे फोन करण परां खुद एसीबी शिकायत करण वाळां ताई पूग र जरूरी कार्रवाई करे है।

000